

四庫全書

集部

欽定四庫全書

吳文正集卷六十五

元 吳澄 撰

墓碑

有元同知東川路總管府事孫侯墓碑

至大四年十月朔同知東川路總管府事孫侯以疾終於家其明年十二月將葬前溆浦縣尹蕭君以書來為其孤福齡請徵文以表墓隧之碑孫蕭親也蕭予舊也

其請不可違孫鉅族也侯美士也其美有足揚者遂不復辭謹按孫氏有三其一姬姓衛公子惠孫之後其一牟姓楚令尹叔敖之後其一媯姓齊陳無宇曰孫栢子其曾孫武奔吳為闔閭將著兵法十三篇唐末有百將率師駐虔虔化留而弗去虔虔化今贛寧都也孫氏為贛寧都人自此始在宋有介夫者與蘇文忠公遊侯之曾大父汝成大父延休父德成世世韞德至侯彌昌侯諱登龍字壽甫家饒於貲身饒於文早年以進士貢平

生嗜利如羽嗜義如渴凡凶荒死喪患難危急不問戚疎邇遠周之拯之惟恐或後橋梁道路苟病於踐履必為完治雖費不計聖朝兵及江南山藪遐僻乘時嘯聚侯扞衛井里獲全生聚者不啻數十百家行省擢充南安路儒學正考滿勅授慶遠南丹溪洞等處軍民安撫司儒學教授一以周孔之教變殊俗休暇之日引古援今懇懇以告司政之官多所匡救裨益大德九年轉授同知歸仁州事越七年而有東川之命由將仕佐郎陞

登仕郎不及拜命而卒年七十一初娶張氏生男二清  
臣獻臣丁丑歲俱殲於兵再娶揭氏以其子延臣歸侯  
子之若子名在吏部八品選中父有庶子九齡侯亦子  
之若子父命也三娶曾氏生男五福齡勅授瑞州路上  
高縣長官祿齡壽齡高齡女六適趙適楊適唐適胡適  
朱其季許適蕭庶子順孫命為延臣之子孫男曾孫孫  
女一嗚呼侯富康而壽考子孫才賢而蕃衍浸浸顯榮  
非好德之福積善之慶乎心潛於義理文雄於場屋誌

侯之墓者云耳文章不及鳴於館閣政事不及福於當  
道狀侯之行者云耳予夙聞侯譽又稽狀與誌而序其  
槩如此繫之以銘銘曰

恂恂文儒行服鄉閭善累惠周天人交孚晚毓英胄繫  
德之符小試儒官施未寸銖進貳郡牧何不須臾時用  
之嗇後慶之腴穹碑厚趺百世弗渝若稽前美允休允  
都

元贈亞中大夫輕車都尉懷孟路總管武功郡

侯蘇府君墓碑

府君諱偉字大用其先自忻代徙順德大父元仕金官  
號猛安謀克大母栗氏父清金拱衛指揮使皇朝贈中  
順大夫上騎都尉同知延慶使司事追封武功郡伯母  
李氏追封武功郡君中順二子長傑仕於廣平路府君  
其次也孝友寬慈篤厚信實涉獵子史尤喜藏室漆園  
之書收貯時賢詩文為家珍采拾善人言行為身範不  
求榮進勤力治生家用饒裕量一歲所入所出幾何贏

餘悉以賑貧歲有常數凶歲則倍官所勸率不與焉內而族親外而鄉閭饑者食之寒者衣之病者藥之死者棺之孤寡無依者居之養之婚媾失時者室之家之惠加於人不自以為德或忘恩負義橫逆來侵待之如常畧不介蒂追孝其先事亡如存晨夕必面朔望必薦雖隆寒盛暑疾風暴雨不廢勉勵子孫謂吾自幼知讀書為美事理家勞疾無暇時可學抱憾終身汝等庇蔭之下飽暖逸居不學將何為哉子孫承命競勗學業名卿



巨儒踵門隆禮尊崇諮訪為善之方竟日不倦諸子出外備防禦之器則喻之曰寇盜豈欲成害人利其財耳設有不虞舍財全軀彼如我何且為善有福為惡有禍汝輩但勉為善終不蹈危厄凡訓戒之言中倫慮達義命往往類此至大甲午二月八日卒年六十八以子貴贈亞中大夫輕車都尉懷孟路總管追封武功郡侯夫人劉氏淑慎寡言內嚴外恕諸婦敬畏子孫遵守家法三世同居大德壬寅四月十四日卒年六十九追封武

功郡夫人子四思溫思讓思敬思義克紹前志輕財好  
惠自大德乙巳至延祐己未十五年間以米賑施及減  
價平糶不啻數千斛楮幣五萬緡置局市藥所得子錢  
修藥劑以濟貧病之人不取其值有戚屬不能自贍出  
貲俾飯糲逐利因是豐足者數十家思敬繇廣福提舉  
陞廣福監大監孫十二楨椿楫森植樸材杞桂其十蘇  
同字仲元名木旁區準史遷稱趙談為趙同例也其十  
一曰栗其十二曰桐楫漆仲元俱仕中朝樸嗜文學別

立在長蘆鎮曾孫志學志道鶴童志學仕為長史大監  
兄弟將刻石府君之墓仲元求予文文之予謂府君積  
善樂施獲報於天身存而富身歿而貴流慶衍迤未艾  
也福善之理豈不昭昭也哉乃序其事而系以銘詩詩  
曰

順德之蘇徙自忻代爰逮亞中浸浸豐太惻彼空窶猶  
已寒饑衣食所贏棄捐如遺施不責報實謂陰德天酢  
其獻如稼必穡錫命寵光貴于九泉世胄繩繩霄翮聯

翩富貴在天維以福善勒名表阡彌久彌顯

元中子碑

元中子黎氏諱立武字以常臨江新喻人年二十八太學二十六擢進士第三人大父母父母俱存一時榮之授承事郎簽書鎮南軍節度判官明年奉四親之官又明年秋貢校文撫州又明年除太學錄又明年通判袁州就任轉宣教郎明年冬除宗正寺簿明年夏兼莊文府教授召試館職除秘書校書冬轉奉議郎以祖母憂

去國明年春除佐著作夏轉承議郎秋除著作赴國難  
趨朝明年春除軍器少監國子司業且將大用而國事  
去矣間道來歸備歷艱險自是閒居三紀逮事二親猶  
二十年北來達官聞譽望覩風采禮之如天人諏訪相  
屬或延致或就見焉意度安舒威儀整暇不待交談人  
已起敬清言疊疊每至夜分雞鳴復興了無倦色少年  
高科常懷謙抑篤志嗜學一如未仕處太學時有同舍  
先達捐介人也數舉前修格言相警發特已接物資益

維多佐洪府時歲饑有同僚言殺一牛活萬蟻欲籍富  
戶賑貧民馭之曰萬蟻固何憐一牛何罪而死衆稱善  
噫有德之言哉官祕省時閱官書愛二郭氏中庸郭游  
程門新喻謝尚書仕夷陵嘗傳其學將由謝沂郭以嗣  
其傳故於大學中庸等書間與世所宗尚者異義生平  
著述積稿如山演繹舊聞敷暢新得有圖有贊有講義  
諸篇悉鏤諸木當路好事者往往取去年六十八微疾  
端坐而逝越六十歲在單閼日次星紀月離天街啟殯

葬于塋莊之原祖考瑛迪功郎考士雲宣義郎祖妣黃氏妣蕭氏娶黃氏教氏俱封孺人子男三本彊本正本成女四壻胡簡徐教孫男五元衍公衍宗衍師衍祖衍女六伯兄立言國學進士好讀易纂諸儒所傳成一書澄撫州校文時所貢士也後三十八年始拜座主於清江之客舍一覲容貌心醉神融喟然曰世有斯人歟世有斯人歟廊廟器也福德身也蓋雍容和粹氣象彷彿河南程伯子云昔闕西張子卒私謚明誠中子質之程

伯子司馬公弗可遂止黎之孤暨門人援王文中為比  
以元中易名伯兄詳其事為狀傳於世諸孤約其文為  
誌納於壙矣噫孟有貞曜陸有文通河汶而後已然澄  
亦門人也而弗得與斯議也乃稽狀與誌寢其凡以碑  
為墓隧銘曰

維德之奇玉色山立師詹鳳儀疇泣麟泣斯焉斯逢斯  
逢斯豐猗與元中有百世公

耿縣丞封贈碑



高唐齊邑也幼讀孟子時知之令升為州至元間嘗過其地在京城識學士閻公高唐人也越三十一年在金谿識縣丞耿君亦高唐人也君名居簡從事廣東宣慰司都元帥府考滿受勅命初任將仕佐郎臨江路知事再任從事郎丞金谿欽遇聖朝待臣之厚官七品得封贈及母妻恩綸將下欲樹碑二親墓隧徵文於予竊觀耿君自為吏入官靡所玷缺仕每稱職臣之忠也拳拳焉以追贈其親為榮子之孝也孝者仁也仁者必惠忠

者義也義者必廉夫苟忠於國孝於家廉於已惠於民則為人之大端具矣予安得不嘉其已往而勸其方來也哉君之父諱潤贈某官母李氏贈某稱妻劉氏封曰某別書於左

故右衛親軍千戶武畧岳將軍墓碑

宣授武畧將軍右衛親軍千戶諱元鎮姓岳氏古修人涉獵書史氣渾厚志雄邁處家御衆有法父雯自國初乞乞效勞任景獻陵三州判官至北京錄事而終將軍

應募從戎戎帥以其父克勤王事俾長百夫從攻江陵  
拔砮矢中股從攻樊城先登矢中頰從攻漢陽西壩從  
攻鄂州東南隅俱有功又於岳州湖口獲數十人俘百  
餘人以獻中統以後從征李壇於濟南又有功至元五  
年充右衛總把天朝方有事於南方從攻安慶從攻淮  
安五河口十二年授忠翊校尉十三年又戰於淮安而  
勝帥府以功上陞忠顯江南平軍使知其嫻習軍務令  
督軍器局十五年佩銀符陞忠武樞府調往上都率卒

供土木役役罷進長千夫二十四年佩金符授武畧將軍宿衛十餘年年六十八致仕娶李氏男四長蚤逝次信次貞庶子順女二長適萬戶之子高某次適右衛千戶鄭銓信以敦武校尉百戶戍嶺北後讓職於弟貞貞在嶺北屯田軍食饒裕還守信安西永清壁迄今二十餘年介國子學生姚絃來言曰貞賴先人緒業從事兵間念吾祖吾父盡瘁報國備著勞績恐久遂沈泯願勒文於石庶其不朽敢以為請予謂皇元自開國至於宋

亡用兵百有餘年以殺獲攻戰立功者多矣而父被堅  
執銳蹈死弗顧名歸於主帥而能追念而父斬其名之  
存孝子也乃為叙其事跡如右將軍之兄弟凡九安鎮  
喜文學朝列大夫江淮榷茶提舉崇鎮河間路檄充景  
州奧魯鎮撫餘不仕銘曰

天朝用兵虎視龍驤掛名尺籍半化侯王將軍忠勇未  
大顯揚勒銘眎後永世用章

元贈少中大夫輕車都尉彭城郡劉侯封彭城

郡張氏太夫人墓碑

至大二年夏天子推恩於其臣尚書省右司郎中劉安  
仁封贈二代祖考贈中順大夫上騎都尉彭城郡伯祖  
妣贈彭城郡太君考贈少中大夫輕車都尉彭城郡侯  
母封彭城郡太夫人越十有三年太夫人卒其明年郎  
中自江西奉母喪歸葬與臨川吳澄邂逅於建康哀經  
涕泣而言曰安仁之祖若父積善種德生不享其豐隆  
荷國厚恩賜爵於身後未能立石其隧以光昭天寵今

吾母歸祔吾父之兆斬一言垂不朽且曰吾父諱誠東昌堂邑人古貌美髯儀觀甚偉淳謹和易長厚忠信嘗訓安仁曰吾寧忍貧不使汝殖生肥家使汝就學者欲汝親師敬友培植漸漬知立身大節嗜義若芻豢避利若蛇蝎以無忝其先世今人率曰毫芒之得致負邱山之累亦由父母不訓以義而責以利故然以貨財殺子孫吾不為也安仁年二十四為行省掾始得祿繼任衡州路總管府知事南康路建昌縣丞將母就養至元之

季征交趾馬價頗增安仁官滿留家餘一馬買者償價  
五倍於初值吾父曰兵將買馬為國出力止依初直售  
之鄉閭歎服其義因訓安仁曰家之饒乏由乎天多取  
馬價奚為哉汝祖父有言士不能忍窮一事不能立汝  
今食祿矣但守公廉勤三字何所不利凡事宜加堅忍  
堅忍則處大患難不懾處大富貴不矜始可謂大丈夫  
苟得於一時遺臭於久遠汝其戒之又五年安仁任饒  
州路餘干州判官大德二年六月二十一日吾父終於



家年六十有三七月訃至安仁奔赴成服葬於侯垵鎮  
南原之祖塋吾母張氏同邑里貞靜懿淑表裏一實孝  
養祖父母事吾父敬順不違待賓客竭家之所有缺則  
借貸以給安仁六歲讀書母晝促其學夜課其誦予未  
成誦母已先記曰汝襁抱中不聞啼聲人謂異於常兒  
長必可教家雖貧不廢汝學期汝燭理循義雖凍餒無  
憾若夫榮達則有命安仁年十九從師江淮母寄書以  
訓謂宜明綱常之道除潭州路治中時寓居建康吾母

七十有七矣慮大江洞庭汴流四千餘里風濤險惡欲辭職侍親吾母訓曰汝起白屋際明時三厯州縣官入朝掾中書擢工部主事由御史臺監察御史陞都事由尚書省右司員外郎陞郎中先世受贈我亦受封其何以報國徒以我年老而欲辭官耶奉職養親忠孝兩得神所祐也舟行何懼焉皇慶二年正月二十四日發建康行近蕪湖西北雲集風起并力牽拽先客舟而行鰲賈巨航在前弗讓母曰勿爭先也彼航牽纜忽斷航流

而下我舟遂得先進夜鼓一更始泊未幾雷電風雨霰  
雹交作厥明問之後舟多有損者又行日亭中舟人曰  
過此無可泊之所母曰雖早可止舟甫定大風浪及暮  
大霹靂雪雹與雨雜下三晝夜乃已他舟亦損此獨無  
虞若得神祐云既至長沙吾母訓曰劉門素以積善聞  
汝歷官十餘任舉家食君之祿又獲封贈之榮合思報  
稱汝父常云惟廉勤可追吏責惟公平可服人心汝宜  
堅守不移在官六年無代值歲荒民饑吾母訓曰民為

邦本本固邦寧民不得食猶已饑之邦本不保汝心安  
乎於是移文上司未奉明降先開官倉減價賑糶麥萬  
斛又勸有穀之家貸拾萬餘斛施一萬餘斛吾母喜曰  
汝職分所當為也由是饑民得濟野無餓莩就任改除  
江西行省左右司郎中奉母沿洞庭出大江順流而下  
入彭蠡泝流而上以達於洪居洪三年而天降割至治  
元年十月十一日吾母終於官舍年八十有五安仁才  
劣學淺叨祿四十年幸免缺敗皆父母遺訓所及無以

答罔極之德惟立言君子賜之撰述俾遺美不隊不肖  
孤之願也敢以請澄大德間始識郎中於京師交誼二  
十年如一日竊嘗謂郎中行已守官庶幾古名臣之風  
今聞其家訓如此則熏沐成就固有所自乃為秩序其  
言如右而詩之以麗於左郡侯之考郡伯諱義妣太君  
王氏子二長郎中也次某力農治家孫男五長祚先歿  
次禧次禎次祐次禔孫女三長適郭次適杜次幼詩曰  
累亂陶唐支遠流長漢訖宋金簪紱相望我侯之劉藥

自東昌為庶于今弗耀弗彰閔祿斯發楸毓省郎鬱鬱  
檟梧顯顯圭璋帝降恩言予臣孔臧爾祖爾父被予休  
光有官有勲錫爵昨疆哀死榮生用勸忠良于維郡侯  
舊封若堂維郡夫人新祔茲藏嚴嚴遺訓孤也敢忘子  
子孫孫春露秋霜穹碑差寂天寵輝煌永世垂輝徵此  
詩章

吳文正集卷六十五

欽定四庫全書

吳文正集卷六十六

元 吳澄 撰

墓碑

趙郡賈氏先塋碑

楊州路總管賈庭瑞蒙恩封贈其祖父母父母將勒石  
先塋以揚天子之寵光謂國史院官吳澄曰庭瑞家趙  
州柏鄉縣祖父諱受不仕祖母魯氏李氏父諱諒以學



業為鄉里師不幸蚤世母滑氏自誓靡他父母不能奪其志長育不肖孤教之以父書比長出而從事誤為故丞相順德王答剌罕所知始終服屬未嘗離出丞相行湖廣省事時任檢校又任都事丞相行江浙省事時任都事如在湖廣逮丞相入朝總百揆庭瑞主事刑部遷吏部繼除樞密院都事戶部員外郎大德季年贊丞相定國大計丞相既終除兵部郎中尚書省立除同僉宣徽院改除度支少監以忤近侍棄官養親尚書省廢而

庭瑞居母喪服闋除楊州路總管又以不能嫗媚去職  
逮遇聖時錫命及二代祖父贈亞中大夫順德路總管  
輕車都尉追封武威郡侯祖母並追封武威郡夫人父  
贈嘉議大夫禮部尚書上輕車都尉追封武威郡侯母  
前時嘗以貞節旌表今追封武威郡夫人竊惟國家之  
厚於臣子蓋以勵忠孝顧庭瑞何以報稱然君賜之榮  
世世子孫弗敢忘吾子畀一言文諸碑以慰先靈以觀  
來裔庭瑞之願也澄夙聞賈侯剛直不撓涖官能為人

之所不能為既廉且勇允矣良吏非其先世所積而然  
與則諾而述所聞以詩之曰

洵直賈侯如百鍊金遇事諤諤愧彼瘠瘠昔忠愍王天  
下名相維侯是好好莫或尚醯司挾怨寘人于辟侯往  
平反寃者獲釋官給民監數重難酬侯為減殺民瘼以  
瘳鄂營梵宮畚土躋山逆耳苦諫念民孔艱布十五萬  
一邑困瘁懇請上聞三免其二佐杭保釐政治靡墮使  
閩通變邦用靡虧脩隄展期農不失時督征發隱貴不

得私運值危疑孰匡社稷國倚元臣侯贊密畫鍾亡絃  
在郢沒斤存牙音奚聆石能曷伸彊暴侵陵惡必懲志  
徑堯帝聰宣攝權勢浮亢蠹耗職務節縮頽竭愚忠違  
計身辱作牧淮海興利除害公論去思蒙有遺愛侯謂  
余今先慶所積為子為孫欲報罔極煌煌寵錫光徹九  
泉爰斷聖珉刻詩墓前皇澤如天身拜稽首永世弗諼  
式肅爾後

大元故朝列大夫僉燕南河北道肅政廉訪司

事趙侯墓碑

侯諱思恭字仲敬相安陽人也淹貫儒術精通法律試  
郡從事以才行見知張左丞何平章侯宣慰劉中丞諸  
先達名聲日超擢掌刑部農司宣徽院吏牘勅授從事  
郎轉承事承務充照磨主事經歷三任俱不離宣徽又  
轉承務郎出為燕南河北道提刑按察司判官陞奉直  
大夫入為監察御史制授奉政大夫大司農司經歷改  
僉河北河南道肅政廉訪司事進朝列大夫徙治燕南

元貞丙申十一月十五日以疾卒于大名公館年五十  
五歸葬吳村原先塋之左郡守張孔孫為之志墓泰定  
乙丑余自京師還過金陵而侯之子天綱為江南諸道  
行御史臺掾持侯墓志又自述逸事狀一通請余請曰  
先人以清白自將有猷有為體魄歸于土三十年矣而  
墓碑未樹深罹平生德美久遂泯沒子職之缺莫大焉  
先生閔人子懇切之情而畀之文以光其幽生死俱有  
榮也余察其情誠孝於親者乃按昔所志證今所狀而

章其所可稱侯之曾大父溫大父德俱潛晦父仁孝友  
勤儉明律學金朝選調鈞州司獄侯敦志節勵廉隅脫  
去邊幅樂於從善不長尺寸生業室廬僅庇風雨家無  
婢妾自奉菲薄屢空晏如也其為御史也權相方抑臺  
憲有奇衮袞斂民財迎佛侯糾以法彼交通權門求援  
召侯至政府奮怒詰責將坐以沮壞善事之辟侯從容  
枚舉侵擾之實以白氣平理直權相孰視沈思竟弗能  
罪也山後興州諸路饑移文請賑救省臺就命侯往隨

便宜設方畧活數萬人其為經歷也從司農長官造闕  
庭陳務農重本闕民休戚數十事以答清問其憲河南  
也條列孝弟忠信禮義廉耻之訓以諭愚頑之民俾之  
趨善而不麗于罰民翕然從令及治燕南亦如之先德  
後刑凡事務存大體平反寃滯審辯無辜輕重囚生死  
獄不可勝計雖中心長厚然自能懾伏百司鎮安所部  
歲終考績嘗為諸道之最讀書尤喜義理之學陸宣公  
奏議真文忠公大學衍義許文貞公文集玩繹未嘗去



手聞人有善有能不吝薦舉而人鮮知蓋出自公心非以市私恩也內子焦氏澤州進士茂才之女貞靜淑慈自鑒書史待幼御下具成家範年八十三乃終至治辛酉歲也子男三侃年十九而殤天綱由國子生貢充儒吏由戶部遷行省掾由浙省遷行臺掾天經以兄之讓受父蔭主獲嘉縣簿再任興寧錄事沒官所女二適屯留縣主簿王蔚適淞西廉訪僉事傅汝礪孫男三植早逝次構次楷女一適譙郡皆一門子孫振振已仕者能

官未仕者知學侯之餘慶也余既叙侯之美如右而又  
繫之以銘詩詩曰

若稽臬司衆刻寡慈綽綽儒流允也吏師耽研理趣謹  
飭名檢繫許文貞是式是範由中暨外官三十年一寒  
如初環堵蕭然食藥飲水匪甘維潔儀鳳鳴鸞維祥匪  
孽賑饑獄百萬生存陰德比于昌爾後昆吳村之原  
刻文在石永世勿墮仁者所宅

有元懷遠大將軍處州萬戶府副萬戶刑侯墓

碑

宣武將軍刑答刺忽台以處州副萬戶鎮撫州世武弁而好文儒教子治進士業前貢士于應雷為述其考懷遠大將軍之歷官行事而以請於余曰先君雄毅忠壯威名綽著自為偏裨已稱勇敢摧鋒陷陣勢如破竹撫納降附頑擴革心宦轍驅馳東盡海島南極閩嶠卒伍憚之如嚴師氓隸戴之如慈父棄于時逾三十載而宰上之石未建儻蒙賜之銘詩以賁泉壤豈惟生者得追

子責哉死者亦增幽光矣屬余赴史院之微未能有以塞其請貽書至再三其請彌篤余歎曰人子之孝於其親固有若此者夫謹按其狀侯諱聚般陽路萊州人父德由蘭陵簿長千夫以懷遠大將軍治屯田在淮安戰死侯之官初擢充百戶巡檢總把千戶總管等職至元十四年勅授忠顯校尉佩銀符未幾制授武畧將軍管軍千戶十五年轉武德又轉宣武陞總管佩金符十八年轉明威陞副萬戶二十四年制授處州副萬戶二十

七年進階懷遠大將軍侯之勲攻東海連海有功從禿  
魯罕元帥取東海連海從丞相南征畧通泰破常州定  
沿海溫福興化泉州未附之地往福之永福縣招諭潰  
軍隨日本行中書省官至耽羅山抵倭國界領軍船守平  
戶島收輯福建八郡所轄諸山洞寨手號軍萬三千七  
百人詣海洋松門等處隄備平台寇以寡克衆又獲仙  
居縣寇千餘先鎮岑江繼鎮澈浦遷鎮鉛山二十八年  
八月疾二十七日卒年六十三明年歸葬萊州掖縣方

北村元配劉三男長福宣武將軍管軍千戶卒無嗣繼  
室張二男長答剌忽台處州副萬戶今鎮撫州者也妾  
之有男者三嗚呼中統至元間龍驤虎視羣策其力雲  
起風生各効其用而侯之樹立若是三世將家子孫方  
昌因所報推所施侯之為將其崇陰德而抑陰謀者乎  
固宜銘銘曰

勇冠千軍為國虎臣表終質直壹是情真功存百戰亡  
陟三品歿三十年生氣凜凜有子襲爵有孫勗學三世

將門繩繩後昆掖郊舊墓秋霜春露聿昭斯銘邢氏之興

元故濬州達魯花赤贈中議大夫河中府知府

上騎都尉追封魏郡伯墓碑

丁卯

故濬州達魯花赤遠哥察兒西夏人也歷事三朝以子貴初贈奉議大夫汴梁路治中驍騎尉追封南樂縣子配康里氏追封南樂縣君維郡中議大夫河中府知府上騎都尉進封魏郡伯南樂縣君進封魏郡君維郡伯

世為河西著族父哈石霸都兒善騎射饒智畧臨陣推  
鋒所向無敵太祖皇帝嘉其驚勇錫名霸都兒母篋里  
吉氏以癸巳生郡伯體貌魁偉器識英邁少親行伍長  
益練器甲堅整馳驟勁銳應變赴急奮不顧身定宗皇  
帝選直宿衛謹飭敏給甚稱使令從憲宗皇帝征伐不  
避艱險不憚勞苦凡所俘獲悉不私有丙辰歲以功受  
濬州達魯花赤時軍旅繹騷徵役繁重中州凋弊土曠  
民稀而能惠愛撫綏如古循吏於是流逋四集田野而



日聞竟內稱治中統壬戌山東作亂奉詔扞禦南兵斬將二人奪馬二匹捷聞賞銀百兩回賜所獻二馬在官日久與濬民相安世漸平定無意仕進買田築室藜陽山下治生教子二十二年乃終終之日至元甲申之歲正月壬戌也壽五十二葬黎陽山康里郡君儉勤理家至老不倦子哈剌哈孫讀儒書通文法大德庚子授承事郎江西等處行中書省左右司都事郡君授祿養壬寅正月甲辰終于官所壽六十九歸柩合葬郡伯卒後

三十五年當延祐戊午子改授奉議大夫同知江州路  
總管府事始蒙恩封贈二親又十年當泰定丁卯子以  
中議大夫漢陽府知府致仕再蒙恩加贈加封具書諭  
于臨川吳澄曰哈刺哈孫生甫四歲先父郡伯已不仕  
莫能詳其施政恤民之實所聞於先母郡君者百不  
一二然承天渥榮貴泉壤至再倘無文追述以示方來  
非孝子也是以竊有請焉余素知江州貳侯之賢今又  
得知其先世累功之因信乎水木之有原本也乃不辭

而叙次其世如石孫男三脫因泣江西行省宣使納嘉  
德從事郎潭州路安化縣達魯花赤兼勸農事其季鄉  
貢進士教化將父命詣余求文者也女一曾孫男五女  
二詩繫左詩曰皇元啟運羣力媚奮虎貌效猛鷹準兢迅  
桓桓魏伯西士奇雋先朝舊臣育此胄亂入厲禁庭恪  
守忠蓋士陪戎路卓冠行陣皇選爾勞宅牧于濬濬民  
父之千里河潤畫省夫耕夜息鬼磷有牛濕濕无犬秋  
秋世皇龍御雷煒雷震將同軌文首削方鎮爾爪爾牙

可布可信沐浴泰和勇退怯進乃治田廬乃釋綬印閭  
里相歡歲月一瞬英嗣間興克邁肯訓秩秩訐謨廓廓  
游刃游斧盤根徐櫛亂翬繼乘貳車爰倅列郡身名屢  
遷家聞益振帝制榮視光被幽視階職煌煌勲爵崇峻  
生若沈湮沒也燚燚才猷在昔人用弗盡遭遇在今天  
報國斯窮碑勒美百世不磷不磷維何子孝孫順

大元少中大夫江州路總管贈太中大夫秘書大

監輕車都尉太原郡侯王安定公墓碑

至順  
壬申

公諱彥弼彝之博野人今亞中大夫潮州路總管元恭  
之父故懷遠大將軍贈定遠大將軍武備鄉上輕車都  
尉太原郡侯忠惠公諱興秀之子也王氏世力本務善  
國朝兵至河北忠惠率三十村之民迎其帥師授以幟  
及彝陷受屠三十村之民獨免從大兵徇地長千夫長  
萬夫授懷遠大將軍招撫使佩金符後領人匠都達魯花  
赤年老退閑公襲父職善譯語尚氣任俠嘗欲持匕首  
為友報仇因自殺衆止之選監尖家倉提領東平路

鐵冶俱有績時於八處關隘各置提舉官譏察竊馬互市之人授公奉直大夫潼關大使處十二年發摘奸伏不一浚關南禁溝至今人蒙灌溉利忠惠亦就養關下至元六年卒奉喪歸葬起復中順大夫黃州路宣課都提舉課額最一道知安豐府事流民來歸墾淮南荒田萬餘頃為執田其後創立屯府公之功居多陞少中大夫南康路總管督詣縣定民產高下徼役視農事急緩在前民不堪命而流止者悉復業焉三歲再蝗冒暑率民

吏驅瘞不能為灾燬石脩朱文公所造江岸石閘以禦風濤商旅泊舟得安改江州路總管除前官勵政暇日詣郡率及濂溪景星兩書院勉勵士學咨詢民瘼郡庠日就推壓學計不足以興脩公課之羣儒出學廩之粟各二百斛畀四士分任其真一瓦一木不以煩有司斧者鋸者鑿者朽者衆工兢作或革或因不逾月自禮殿從祀講堂門廡煥然一新郡城北瀕大江城壞無敢完補公慨然興築其夏水大至郡民皆曰公實生我倘如

衆議吾屬魚矣蜀人范先生大性數十年寄隱公造其  
廬命子事之以師禮錄其所著易輯畧以傳江州任滿  
還蠡不復仕謂元恭曰吾欲買田建義塾教鄉里子爾  
能遂吾志乎元恭應曰不敢隨遺規地四畝構講堂及  
兩廡延鄉之名德為師有田二百四十畝歲供廩食外  
設大門中設燕居旁豎一樓以庋書籍每日誦讀不輟  
鄉里藹然興孝讓禮義之風至大戊申正月八日公年  
八十九終于里第二月十八日合葬太原郡夫人鄭氏



張氏之兆子男三元德忠顯校尉安慶路管軍總把元  
恭由承務郎翰林都事承直郎高郵縣縣尹廬州路總  
管府推官奉議大夫江西等處行中書省理問遷亞中  
大夫潮州路總管女五長適金紫光祿大夫平章政事  
鄂國公史弼追封鄂國夫人次適中梁路總管陳柔追  
封潁川郡夫人次適六合縣尹董汝楫次適中慶路蒙  
古字教授薛良次適呂元魯曾孫男遵丞直郎大都右  
警巡院副使進丞直郎南康路總管府推官達未仕道

中書省蒙古必閣赤遲遇俱未仕女孫長適盧信次適  
真定路趙州判官李某次適奉訓大夫廣州路增城縣  
尹董仲玉次適丞直郎江浙行省左右司都事鄧巨川  
次適史某曾孫男亨用中書省宣使餘幼公之考暨公  
蒙恩追贈制曰懷遠大將軍王興秀可贈定遠大將軍  
武備鄉上輕車都尉追封太原郡侯謚忠惠少中大夫  
王彥弼可贈太中大夫秘書太監輕車都尉追封太原  
郡侯謚文安逮至順壬申公之子元恭自潮貽書臨川

吳澄請文墓石距公卒葬之年二十五年矣澄以孝子之榮哀其親也不辭而為序次其行事大槩繫之以詩曰王氏之初執其簞壺先識迎師全活里閭挺生英嗣繼世膺仕早負俠豪晚作循吏老而歸休桑梓優游期化鄉人世于魯鄒靡玷靡疚神所扶佑詵詵胄胤綽綽遐壽綸恩焜煌加賜官勲胙之侯爵易名彌尊有躋潮特追孝誠篤勒文堅石用顯前躅

皇元贈中順大夫禮部侍郎上騎都尉天水郡

伯趙府君墓碑

朝散大夫雲南詣道肅政廉訪使趙成慶昨任山  
南憲副時考府君垠祖贈中順大夫禮部侍郎上  
騎都尉追封天水郡伯妣夫人胡氏贈天水縣君  
今將赴雲南過家立石墓前以表上之恩以章親  
之榮貽書臨川吳澄俾文詣石澄耄耄疲癯非能  
馳騁筆墨者矣然廉訪使此舉臣之敬上也子之  
孝親也一舉而臣子之道兩得樂於為之言是以

勉力承命而不辭趙氏東川著姓家于銅山素羸  
於貲輕利好惠府君少共子職母嘗病劇拜醫顧  
神誠意懇切苟可已疾靡事不為母竟獲瘳其後  
天兵下蜀母已不存奉父如渝渝亦受圍又值歲  
饑貶粥已度晨夕越數年父遘時疫願言歸骨鄉  
里及父喪偵伺兵退跋履險艱間道扶柩返喪與  
母同兆時蜀言及父難孔棘宋東川即百計支柱府君亦  
署百夫長尋即退閒宋亡蜀附居民始紓府君每念遭

逢世運之厄能復業者有幾夫婦合志信禮佛像雖重  
費不吝惻惻懷哀閔羣庶心矧恤救助厚施而不靳報  
有負無償者弗責自奉甚約縷絲粒粟戒勿暴殄勤勤  
於小物肫肫於大倫衆口同稱善人翰林侍讀學士李  
原道所撰先塋碑紀述備悉茲不再書府君卒大德戊  
戌九月四日年六十八其夫人卒皇慶壬子三月七日  
年八十二並葬鄆縣富國鄉之東山子男四成桂成芝  
成憲成慶季子也其仕始行省理問所知事至廉訪使

十四任其階始將仕郎至朝散大夫凡七轉考妣受贈官亦三矣女三壻牟仲保王文德中女疾不嫁孫男七女七靖惟趙之先德所培者深故其施于後嗣所發者茂廉訪使徧歷中外臺省公忠清謹粹然無瑕之寶有用之器聞著當今光被既往國之良臣家之良子已且復遠徵老拙之文人子愛親之孝罔限極也雖然澄之文虛言爾欲顯其親在立身揚名恐辱其先在脩身慎行廉訪使所慎所揚固已寡過多譽其尚彌最所脩彌

堅所立行無怠於終則名有加於初垂二親不朽之聲  
延百世未艾之祉在已不在人也已之實行可傳其此  
藉人之虛言而傳者豈不相去萬萬哉

有元朝列大夫撫州路總管府治中致仕李侯

墓碑

元統癸酉

朝列大夫撫州路總管府治中致仕李侯之子輔自洪  
郡至撫郡之遠鄙水陸五百里觸冒盛暑造吾門請曰  
輔之先君生戊申年七月三日延祐乙卯六月二十七



日終年六十有八天曆庚午七月十一日葬礪州涇陽縣  
南之祖塋先夫人隴西郡太君陳氏生辛酉年十一月  
二十一日至順壬申四月一日終年七十有二將以某年  
某月日歸鄉附葬焉痛惟先君棄世已十九年而墓石  
未建不肖孤弗克立身揚名以顯其親懼久遂湮沒敢  
蘄一言以發潛幽則先君雖死猶生也維侯嘗官于撫  
予雖不及識聞其為循良吏其子能以儒術起家以時  
才獲用而予識之舊矣其情懇切誠孝於親者是以不

辭而為之叙次如左侯諱璋字君用曾祖定祖均世為  
汴梁杞縣人考實避金亂徙廣平路礪州滏陽縣生三  
子侯其次至元六年舉兵攻襄樊伯兄留綜家務而侯  
從軍以能通書計充軍府令史天下既一擢廣西宣慰  
司都事未幾從湖廣行省官往海外四郡建安撫司行  
省官宋舊人也狃于故習任意輕殺侯執法抗議全沽  
數百以功陞化州路判官時權姦柄國仕者率由賄進  
侯久勞廣海理宜優叙以不阿媚至元十八年左遷潭

州澧陵縣尉二十一年授將仕郎象州路總管府知事  
未任選為湖廣省掾從鎮南王征交趾自陸路深入官  
軍失利陷沒者半獨侯所領百衆力戰三日獲其偏校  
以還隨上官詣闕條陳軍中利害請以戰艦由海洋擣  
其巢穴因是交趾內附朝貢至今尚書省更至元鈔二  
十七年除常州路平準行用庫提領鈔法流通官利民  
便元貞元年授承事郎尹贛之興國明年有妖賊作致  
動重臣大兵殄捕侯躬率民義嚮導徧榜諸鄉諭良民

棄若寧家以別於賊而不罹玉石俱焚之禍先是邑中  
豪民惑於其妖各餽牛酒金帛以表崇信賊酋籍其名  
姓百餘家及寇平得其籍侯憮然曰此愚民無識而然  
畀之於火竟無冒星重臣亦嘉之獎其勞來安集之功  
而薦諸朝民懷其德立祠報事後聞侯喪莫不感涕大  
德四年改授吉安龍泉尹化民為善有兄弟爭田財數  
年不決侯閉門自責累日不視事其民羞愧願改過自  
息其年脩學校之廢正版籍之訛開墾係官荒田若干

畝歲收三千餘斛存貯以備饑歲民免艱糴縣瀕大溪  
當行人往來之衝每春漲浪急渡舟常多覆溺造浮梁  
百餘丈利涉無虞在任六年既去民猶思之至大元年  
授承務郎撫州路推官平反冤獄十餘行屬邑審囚咸  
稱其平恕明決年未七十以疾告致仕得進階朝列進  
職治中比命下侯已先逝矣侯端謹重厚清苦澹泊仕  
於南中所得俸給悉送還家以奉二親撫育族從孤幼  
男女十數逮其成人而為嫁娶大德三年歸省祖塋買

土故鄉凡一家內外未葬之親各以昭穆序葬墓黨里之謹愿者永遠守護囑族屬之慈順者歲時展視初娶薛氏早卒再娶陳氏以長子輔恩例受封從夫四品爵秩子男四輔繇龍興路儒學二吏工部掾江西省教授全州路儒學教授掾湖廣省陞掾中書省丐侍親授承務郎江西等處行中書省檢校官次輅三祐四輯女三彭椿王新梁詢壻也孫男五愿簡直某某女四適米適常適周幼者未行輔自述其父之事云爾輔也通而能

介介而能通仕不廢學學不廢仕儒且才已有望有聞靡瑕靡壘志在章父之美勤勤如也觀其子知其父則侯之可銘也無愧銘曰

拔之行伍而史而府畀之民土而字而撫父也能吏子也才士克章前美父有孝子

吳文正集卷六十六

欽定四庫全書

集部

吳文正集卷六十七至  
九

御史<sup>臣</sup>邱文愷覆勘

武英殿纂修編修<sup>臣</sup>吳廷選



欽定四庫全書

吳文正集卷六十七

元 吳澄 撰

墓表

有元翰林學士承旨資德大夫知制誥兼修國  
史加贈宣獻佐理功臣銀青榮祿大夫少保  
趙國董忠穆公墓表

公諱文用字彥材真定藁城人贈光祿大夫司徒趙國

宣懿公諱昕之孫龍虎衛上將軍左副元帥贈推忠翊  
運效節功臣大傳開府儀同三司上柱國趙國忠烈公  
諱俊之子也忠烈起自畎畝為國竭忠而死有八子其  
元子文炳以左丞從伯顏丞相平江南功第一贈金紫  
光祿大夫平章政事加贈宣忠佐運開濟功臣太尉開  
府儀同三司上柱國封趙國公謚忠獻其季子文忠某  
官帷幄近臣贈光祿大夫司徒加贈體仁保國佐運功  
臣太師開府儀同三司上柱國封趙國公謚正獻公忠

獻之弟正獻之兄於次居八子中之三生十歲而孤伯  
兄忠獻教諸弟如父之教子得侍其先生軸為師故公  
器業夙成武將家偉然為文儒少事世祖皇帝于潛邸  
中統元年張公文謙宣撫大名辟公為左司郎中二年  
以兵部郎中參議都元帥府事至元元年除西夏中興  
行省郎中五年立御史臺除山東道提刑按察副使八  
年置大司農司為山東勸農使十二年擢兵部侍郎十  
三年佩金虎符出為衛輝路總管去衛時年踰六十浸

不喜仕築遐觀亭日與鄉人飲酒賦詩若將終身十九年起為兵部尚書尋改禮部尚書又遷翰林侍讀學士知秘書監二十二年拜江浙行省參知政事二十五年為御史中丞權相忌之奏公為大司農又徙公翰林學士承旨三十一年成宗即位加資善大夫知制誥兼修國史大德元年進資德大夫致仕六月戊申以疾薨于里第年七十四八月甲午葬藁城西北高里先塋之左五年翰林間學士復以大都路儒學虞教授集所述行

狀撰公神道碑其後蒙恩特贈銀青榮祿大夫少保封  
壽國公謚忠穆又加贈宣猷佐理功臣改封趙國公至  
順三年公之子南康路總管士恒貽書臨川吳澄曰先  
公平生言行碑銘可稽然薦膺六龍封謚名爵既異復  
有待於不一之書也澄舊嘗忝竊微祿客京華稔聞公  
名時公已即世不及親見公之行事矣謹按前碑叙公  
之大槩以表于墓初憲宗南伐先加兵於蜀世祖以太  
弟帥東侯之師趨鄂渚將次江上公伯兄獻謀謂兵法

先人有奪人之心願假戈船先諸軍渡江公暨季弟統  
勁卒數百以從徑薄南岸三戰三捷公還報世祖駐馬  
臨江酌公卮酒使申令諸將旦日畢渡會憲宗崩咸請  
乘勝進取公獨建議班師歸定國事以為他日南土可  
傳檄而定世祖然其議其後宋既平每對朝臣嘉獎公  
之先識公佐西夏行省時新承渾都海之亂往者憚於  
行至者憚於留公言人臣不當避難悉心撫治開諸渠  
溉平涼甘肅瓜沙數州之田予民種及農具諸部落渡

河來歸者日衆人地割界諸王常賦外其下徵索無度  
公與王傳言賢王國之懿親仁聲洽於四遠下人縱恣  
如此將無累王盛德乎俚指數其不法數十事傳驚起  
白王王召公謝曰微公不聞斯言幸持此心勿怠三年  
之間所畫皆便民夏境遂安齊魯故饒穀粟公勸農山  
東躬自督視闢其汙萊至于海瀕績最諸道公之為兵  
部侍郎也前侍郎平章阿哈瑪私人教鷹監入愬令侍  
郎不給鷹食世祖怒召至望見公乃曰董文用豈治鷹

食者耶懇竟不行公之為衛輝總管也江南初臣屬輦致金帛送京師者道衛晝夜不絕日役數千夫護送公曰東作方興無奪農時遣胥校足矣議引沁水入御河以通運漕公曰沁水地勢高於衛倘積雨彌旬沁水灌衛又使入河河不受還入衛則衛惟其厄且無大名長蘆矣部使者與水衡度水如公所言遂止衛人德公焉公之為兵部尚書也預議大改江淮行省惡臺憲繩已欲使行臺受制行省公曰不可風憲之司猶虎今虛名



僅存如虎雖睡人猶有所憚若更受制於人貪虐之官  
吏蔑顧忌矣議遂寢賈人盧世榮主權倖驟陞中書右  
丞謂生財有術民不加賦而歲倍入詔廷臣集議衆莫  
敢言公時為翰林集賢學士詰之曰是錢若不取於民  
倍入之利將安出譬之牧羊每歲僅可再難其毛若時  
復一難羊主得毛雖多而羊死寒熱矣取民者亦然日  
削月朘邦本先威寧復有財可取太祖聖武皇帝提尺  
筆起朔方以有此民而忍於戕之乎丞相安童曰董尚

書議是未幾世榮誅公辭江淮參政之命曰錢穀事繁  
臣不任治劇上曰江浙重地煩卿鎮之乃奉詔時行省  
之長矜傲同列畏懾公與論事無所屈一日選嚴酷吏  
百輩將括民田民大駭公力止之浮屠人得旨於亡宋  
故宮造塔有司役民入山伐木大雨雪多凍死公命緩  
其事省長揚言參政格詔旨公曰隆冬興役民不能堪  
將失浙人心非詔旨也長有愧色事亦紓日本之役倚  
辨兩入奏有詔罷兵僧格擅威權橫斂雖臺臣莫敢誰

何公為中丞怒公不附已据撫臺務百端公與廷辨不  
少挫嘗慨然曰郡縣病極救之無它策惟當選按察使  
舉雷公膺胡公祗通等十餘人天下賴之復以僧格奸  
狀告上不報而僧格奏公憊懃不聽令沮撓尚書省政  
將陷于辟世祖徐曰董文用朕所知由是不能害則禡  
其臺權而擯公于農官欲奪民田為屯田公固執不許  
則又禡其農職而寘公于翰苑僧格敗公譽望益重世  
祖命公授諸皇孫詔曰老人畏寒須暄和時至帳中敕

內侍親具膳每預宴與蒙古鉅族齒或時賜飲御榻特  
命毋拜其眷遇之隆漢人無出其右嘗命公見其諸子  
公奏荷國厚恩報効無所不敢以子弟累陛下成宗初  
公覲于上都召入便殿賜錦衣玉帶雙玉佩環從幸三  
部落又賜緡錢萬五千券日久奉顧問公陳國朝故事  
累累言先皇虛心納賢經國之務嘗至夜分國朝譜繫  
勲舊世家公記纂詳盡史修實錄咸就公考正上章請  
老詔賜緡錢萬券官一子鄉郡以便養既得請咨院呈

省言故父歿於國事自願不令子孫承廕乞將自己職  
事易故父封謚時臺臣有送公出境者比還同僚訝其  
來之遲則具言公居廡賃賣居室以償所稱貸而去其  
父忠勇死國未蒙旌異今請以廕其子者易封其父豈  
非忠孝兩全之人與聞者莫不嗟愕於是合臺備舉其  
事于省并以聞奏旋蒙聖恩特贈其父功臣名號官勲  
封謚夫人王氏寧晉元帥某之女先公卒再娶周氏江  
淮漕運使某之女後公四日卒子男八長士貞次士亨

後仲兄右衛君官至昭勇大將軍佩金符侍衛親軍都  
指揮副使早卒三士楷四士英五士昌六士恒初以特  
旨授承務郎真定路總管府判官繼厯肅政廉訪司官  
僉事凡再副使亦再令授中大夫南康路總管七士庶  
國子助教翰林編修季士方女四壻趙琚周叔齊東縣  
尹王良傑孫男十七守約知亳州事守缺右都衛副指  
揮使女十曾孫男七玄孫男缺神道碑曰公天資仁孝  
歲時事祖禰如事生事兄忠獻公如事父訓飭子弟嚴

而有禮與人交侃侃和易好賢樂善不啻饑渴蒞官以  
寬大為務不事細故國有大議能言人之所不敢遇不  
可辭氣憤厲雖賁育之勇不能過閒居聞朝有失政輒  
終夕不寐倚壁嘆曰祖宗險阻艱難以取天下而使賊  
臣壞之嘗言人臣當以節義報上不可偷安以負國家  
憂患之誠老而彌篤前後所遭宿奸巨慝謀中公者數  
矣賴聖主知公之深眷公之重故其謀不得逞古所謂  
忠信自結主知者非耶仕宦餘五十年及薨其家惟有

祭器書冊紙墨蓋得公之實云

故存畊居士許公墓表

承事郎同知太和州事曾翰狀其同郡許君希顏之行  
曰君少而穎異長則重義輕財慷慨有氣節孝友稱於  
族恩信著於鄉恤孤周急救貧賑饑排難解紛不自以  
為德喜讀史觀古義士輒感慨奮發企慕若儉狡誤人  
家國忠烈不克令終必齧齒撫案嘖嘖嗟惋戒其子云  
汝曹何修何飾而飽食煖衣苟能謙恭畏慎力學務本



師法賢哲庶保長此每見名門鉅姓被不肖子蕩覆其家深可寒心汝曹戒哉人以存畊居士號之蓋目之實也其子欲章父之美囑所親黎世英持狀來求予文將勒諸石黎又介從士郎茶陵州判許晉孫先導子閱其狀有可書者遂諾不辭按狀君言之萬安人仕淵名希顏字也系出長沙析派數代後樂萬安之下造而家焉自曾大父生業以饒大父暨父拓闢彌廣兄弟三人君其季也居阮龍泉南康贛縣之衝至元末隣境猶弗靖

君輯護鎮遏寇不能犯里居以寧嘗寓廣陵旅邸館主  
囊括諸客之資一夕逃去衆束手罔措君過聞于官逃  
者密令人償君一倍冀以弭訟君不可執其人悉得同  
舍所失乃已衆感其義在家兄弟衆聚怡如也僕役給  
使肅如也賓朋交際歡如也別墅山水明秀花貢羅簇  
圖書左右子孫滿前賓客過從觴咏笑歌有晉人流風  
卒延祐己未冬季六日年五十一娶蕭贛之望族宗戚  
咸謂賢淑成君之善內助與有力後六年而卒泰定甲

子夏季既望也子夢炎夢齡治前後喪合葬黃竹山之  
原孫男四琮璋珪瑜孫女二二子幼書謹身切切於追  
遠孝也

臨川吳澄曰許晉孫延祐山外進士也曾翰泰定甲子  
進士也二進士傑特予所嘉於希顏皆非素識也而為  
之狀為之言則希顏之為人可知也是以表其墓

元贈承務郎山東東西道宣慰司經歷蔡君墓  
表

撫州路總管府推官蔡侯裔之父諱青天歷二年奉勅  
追贈承務郎山東東西道宣慰司經歷母劉氏追封恭  
人越四年予至撫城推官諗予曰裔起身田野際遇明  
時甄錄微勞蓋郡牧伯共治天子之民惻惻懼弗勝任  
皇澤如春普徧羣品榮被二親將何以報稱願畀一言  
丈諸墓石以章天寵之優昭示子孫于永世庶幾人臣  
敬上之義人子愛親之誠而不忒乎澄謹按蔡氏先世  
歸德府睢州人經歷君之考諱旺其妣王氏遷東平之

汶上復遷濟寧之鉅野經歷六男三女男一澤二瑾三  
琰推官居四五順六潤女一適姚二適姜三適高經歷  
丁亥歲五月十八日生七十三而歿大德己亥七月十  
一日也劉恭人甲午歲正月十三日生七十六而歿至  
大己酉十二月四日也並葬鉅野縣之東垓村推官以  
其父受贈之前一年仕于撫今五年矣其在郡也長貳  
同列屢更皆喜與之為僚下屬邑審訊獄訟者致哀矜  
詳慎之意終始如一凡所斷決兩造靡不心悅誠服過

滿未代上下咸欲其留唯恐其去一身之循良一家之積累也父母身後之受國恩宜哉推官娶邱亦封恭人子升暨晉經歷之孫也習進士業俊邁出衆蔡氏之慶其方源源而來也歟

故武義將軍臨江萬戶府上千戶所達魯花赤也先不花墓表

故武義將軍也先不花族出乃蠻解氏隸山東河北蒙古軍初以阿木丞相帳然管軍百戶從攻襄樊伯顏丞

相渡江之後從行省參政破潭州有功至元十三年授  
忠顯校尉管軍總把掌潭州新附軍隨湖南行省破靜  
江又有功靜江既得隨史萬戶徇廣西未附州郡直抵  
各郡城下柳賓慶遠邕州皆降諸郡既附惟遠鄉僻地  
阻險自保乃隨潭省參政收捕衡永等處自領軍兼領  
諸蠻軍平珍常寧縣清水洞及火田村火几村麓石村  
李公洞俱底帖息十四年宣授武略將軍管軍千戶佩  
金符掌新附軍如故十九年鎮守吉郡吉之永新彭原

山太和下平寨及永新煙市及滕鄉瓦岡及廬陵站溪  
及永新黎頭山相繼不靜三四年間一一勦戮其為寇  
者縱釋其為民者二十五年宣授武義將軍上千戶所  
達魯花赤屬臨江萬戶府二十七年摘撥鎮守南安病  
作不行養病于家大德五年八月十六日卒年六十六  
男買奴開習騎射讀書知義理又通蒙古言語自少給  
使于內至大三年宣授奉訓大夫太府院判官延祐二  
年臺除奉直大夫西臺御史五年改除奉議大夫南臺



御史侍親不出越十年除僉江西湖東道肅政廉訪使  
事至順三年四月偕中使下諸郡審理罪囚八月三日  
以疾終于建昌年六十二長孫伯顏泰定元年受宣命  
襲祖職次孫

缺

未仕澄舊識御史於金陵近過臨

川時謂其父歿三十二年而墓未立石方徵余文以表  
于墓去不半月而武義之次孫以御史之新喪至矣哀  
哉武義君彊毅勇敢臨陣每多殺戮累功不一而未及  
取高爵寧無將軍不侯之憾乎其子褒然武將家之文

儒風憲有聲望亦復不壽憐才者為之於邑焉

廬陵易中甫墓表

貢舉未行時士之欲隨世就功名者偃偃靡戾不得不折而歸於在官之府史廬陵多材士若易中甫卓犖殊尤者也少登劉大博先生之門薰漬膏馥呻畢弄翰往往度越輩流既而以才選從事古豫章郡遷調臨川又遷調宜春考滿例陞縣府史之長得章貢雩都至縣未及上以疾卒中甫名立中廬陵太和个人生宋咸淳辛未

十一月卒以至治癸亥七月十一日其年十月二十七日葬太和千秋鄉之梓潼嶺其子原徵志銘泰定乙丑冬余自京師還而中甫掩壙已久乃為叙其歲月以表于墓中甫精敏練達所歷俱有政聲在洪貸官米賑饑辨誣盜馬者在撫出死獄司倉平槩量在袁戢流民之擾抑豪奪墓地之橫似此不一十歲而孤養母盡歡母壽終八十間居左右圖史玩閱無倦下逮術數末技亦皆究心娶徐子男二女一孫男三嗚呼中甫有時才曾

不獲齒於下士展布一二是以憐才哀命之君子不能  
不嘆息於斯焉

樂安陳文秀故妻賴氏阡表

賴氏秀慧居歐鄉世父擢科尉宜黃生宋景定壬戌春  
二十來歸東川陳夫名文秀庭芝字四男一女余其壻  
大德丙午正月終葬長畬原丁未冬堂封二十有三年  
夫索吾文表荒阡子肖婦宜孫蟄蟄孫男十三孫女十

吳文正集卷六十七

欽定四庫全書

吳文正集卷六十八

元 吳澄 撰

墓表

故安慶府同知徐府君墓表

安慶府君徐氏諱必茂字幼學臨江清江縣人父兵部侍郎諱卿孫宋末名臣炎祚訖錄無復有人間意遁身野寺越五載厭世其得安全考終脫然靡所繫累者以

府君為之子能負荷家政不以毫髮事櫻親懷也既畢父喪一再受命尉潭之長沙簿汀之上杭最後同知安慶俱以養母不就職母黃氏令人惟一女最鍾愛納文陞為壻仕至集賢直學士府君視妹夫不異同出聚處一門終始無纖隙順悅母心備殫其極厚於所厚推之及人無一不厚待兄子猶子羣從宗族雖疏猶親母之黨二姓妻之黨三姓恤亡周存敬尊矜賤惟均侍郎所師暨知舊僚屬已所師暨姻戚鄉里凡其後嗣伶俜弗

克自業頓踣弗克自樹者一一振德之雖技術襍流踵  
門亦歡愜而去接人謙和恭謹未嘗疾言遽色如春陽  
之溫煦如甘澍之膏潤如萬頃陂池汪洋莫測其涯涘  
敦於倫紀篤於恩義有太過無不及凶歲賑施惻然猶  
已饑之之思六行之實罔或缺一自脩於家不求知於  
時翰林承旨王公構儒學提舉鄭君陶孫素不輕許與  
皆舉府君堪館閣之選初娶提幹鄒君之女再娶錄判  
聶君之女三娶同知全州總管府湯侯之女也二子鎡

鋪居常啖藥多剛劑至大庚戌忽屏藥弗服四月微病  
丙辰遷坐毋令人前以辭永訣而逝年五十三其年十  
一月甲申葬留墓原舊有志銘矣泰定乙丑十二月丙  
申改葬族湖龍會山鎡復徵文表新墓惟府君之細行  
衆美悉數之未可既故為述其大節以傳不朽焉

元贈奉議大夫驍騎尉河東縣子段君墓表

君諱思溫字叔恭其先居絳之稷山自宋司理參車應  
規始金贈中奉大夫武威郡侯鉅生鈞君之高祖也季



弟某正隆二年進士仕至中奉大夫夔州防禦使兄弟  
俱以學行顯人稱為河東二段曾祖汝舟祖恒生克已  
君之考也有詩文號遯菴集仲弟成已至大七年進士  
主河南宜城簿詩文號菊軒集與兄齊名又稱為河  
東二段君遯菴翁之弟三子年十二而孤已如成人從  
仲父菊軒翁學遂成名儒年二十一受室河中魯氏因  
家焉於經尤邃易春秋詩文溫厚純正授業鄉里多所  
造就節縮衣食買書萬餘卷以遺子孫安西王聘為記

室參軍辭疾不起年二十九丁母憂致哀盡禮越四年仲又卒喪之如父年四十九而終至元戊子歲三月也次月葬稷山旌汾鄉平瀧原之先塋子輔由應奉翰林歷西臺南臺中臺三御史僉燕南河北道肅政廉訪司事入為國子司業太常禮儀院判官君以子貴贈奉議大夫驍騎尉追封河東縣子配魯氏追封河東縣君君之粹學篤行奉訓大夫同贊善恐追撰志銘述之已詳輔將改題墓額於石以彰天貺之榮而余為之文以表

其墓云

元贈承事郎封邱縣尹朱君墓表

丁卯

承事郎撫州路經歷朱端以書言曰端世居汴之鄆陵  
年十六試吏踰三十為郡從事不幸二親喪又十年仕  
淮西憲府考滿授將仕佐郎太平路照磨延祐戊午簿  
建康之江寧既而掾江浙行省泰定甲子陞正七品掌  
案牘于撫越三年丙寅蒙恩封贈父母吾父諱改字國  
用金末辛巳歲生樸厚淳雅重然諾常以愛人澤物為

心處姻族里閨恂恂如也少失怙恃事祖母甚謹年十二奉祖母避兵匿土空中出取食為哨騎所獲帥首俾為伍長率衆北渡中道宵遯數日得達祖母所未幾再被俘與家杳不相聞留大名三十年餘壻于闔思親懇切日夕哀慕乃攜妻子歸至鄆陵時祖母已卽世號慟幾絕惟兄尚存友愛彌篤養之終身吾母閻氏剛果善持家刻意教子吾父年七十三而卒與母合葬汴之先塋父卒後三十四年贈承事郎汴梁路封丘縣尹母贈

宜人端追念先人潛德弗耀不肖孤謏才幸霑微祿聖  
恩天廣光賁泉壤倘不刻辭示後非所以揚親之美而  
彰君之貺也端為簡書之故弗敢離次謹命子復禮見  
而有請焉先生賜一言文諸石則為臣為子者之心庶  
其有校乎余初識經歷君於金陵固已嘉其人及今撫  
州之政公正寬平益循良吏也且聞昔仕憲府時平反  
重囚多所全活其陰德在人獲報於天宜未艾也不有  
賢父何以有是賢子哉表其世美以為積善而昌其子

孫者之勸余之志是以樂為之道而俾碣于其墓云封  
邱府君一男端也三女俱適士族孫男三長明信早夭  
次明實幼復禮孫女一

廬陵蕭明叔墓表

廬陵蕭復清儒家子能詩寄迹道家者流一再及門言  
曰蕭氏吉龍泉之著姓而吾先世居夏湖為尤盛吾父  
明叔行實文聲度越儔輩屢試進士不得貢科既廢巍  
冠侈袂終其身講授遺經淑後進接人和粹謙抑酒酣

氣張豪邁如少壯不治生產屢空晏如二教之書亦所  
樂究屬續前一日猶對客談黃庭厥明無疾而逝生宋  
淳祐癸卯冬仲仲六終於大元大德甲辰春季上七墓  
西溪之小州吾母朱氏外祖前貢士伯兄慶孫紹家學  
詩有集仲兄吉孫早卒復清季也吾兄不偶於時而復  
清遊方之外誠懼先德泯泯無聞公能賜一言永吾親  
以不朽乎嗚呼士之隱處而名湮沒者古今凡幾太史  
公固深悲之子之孝於而父也至矣哉余言之傳不傳

朱可知也而忍違孝子之志乎為書此以表于墓癸發  
明叔名也

劉季說墓表

與余同生淳祐己酉歲者位之顯有程鉅夫居之近有  
劉季說鉅夫生之月後於余四朔一則正月中旬之九  
一則四月中旬之七季說生之日後於鉅夫之六辰一  
則其日日中之干一則其夜夜半之子季說撫樂安人  
世居忠義鄉之台城大父煥依外氏徙雲蓋鄉之南村



而卒天驥自呂城住後焉是生季說名曰夢生警敏惇  
恪三歲而孤母督勗俾進於學雖童稚器識如老成十  
許歲偶至市觀樂有長者曰若亦好此乎聞言羞赧疾  
步而歸爾後雖休暇不出書室能舉子業每不自足究  
玩理趣務蹈其實羣聚狎謔已獨莊重不苟言笑然外  
寬內怡亦不忤俗侍母奉養無違持喪情文兼備葬之  
日會送者數千適強寇入竟望見銘旌聞鐃鼓聲以為  
官軍驚遁而去值邑有狂卒蛇虺善良世業為損先廬

又壞兵盜交擾遂避地他邑繼惟橫政苛斂之禍流離困迫恬然略不芥蒂事勢僅定乃築室自城舊基生理漸完汲汲收書無印本者筆工抄寫諸子百家外天文地理醫卜種樹老佛之說靡不覽選先秦以來古文凡意義同者類相附從中寓教戒足以垂世冠昏喪祭動必遵禮有疑則問辯考正而後行喜談人善或有不善面責其非語當心公人自愧服親故不給隨力以濟歲饑竭廩贍賑為富亡資自底空匱終不怨悔常時命醫

治樂貧病之人來言疾狀即與不取其直邑之長貳聞  
名願見見必加敬凶狡下人心亮其誠不忍侵侮嘗愛  
公委覈實學產不受私囑隱漏悉優命攝教官諸生日  
益勤勵所居前後左右種梅橘植花卉四時皆可娛目  
娶何繼賴男某某女適某某孫男四孫女六皇慶壬子  
八月丁亥以疾終延祐申寅十二月甲申祔葬折原南  
坑祖塋之左泰定丙寅余還自禁林季說之子來請曰  
先子信厚本於天整肅成於學葬十有三年矣而墓碣

未立懼無以傳久遠先生其賜一言余惟季說以夷之清而不害其同似惠之和而不失其介疇昔相與論學有樂無倦豈謂後余以生而先余以沒乎因其子之請而動余悲惻惻感激不能已聊為述其大槩以表二墓

揭志道墓表

豐城揭車之大父道孫字志道英偉豪邁須髯奮張少業進士一筆千餘言世革伎無所施則尚羊山水幽處痛飲狂歌繼以太息後乃還治農圃教授鄉里中曰吾

祖客外每食舍肉將歸遺親親沒事兄如父事姊如母  
姊寡有子十歲被俘極力徧求弗獲養姊于家終其身  
作堂名廣思歲時於中序族年逾四十而鰥不再娶晚  
嗜佛書酒肉俱斷風月良夜鼓琴一二操聲動鬼神年  
六十八將終意氣閒定家人環立揺手止之曰勿亂凝  
然而逝悉此世之不遇者也若酒若佛蓋託焉以消遣  
世慮而不知者譏其使酒佞佛云車能助學懼其祖湮  
沒無聞可謂慈孫也已

故善人申屠君墓表

君諱義字順之前翰林待制承德郎僉江北淮西道肅政廉訪司事致遠之父也待制為監察御史時風采振揚余往歲客江淮間聞其名籍籍後二十餘年始識待制之子駒於京師既而駒從事江西余亦歸自禁林秦定丁卯駒以文一帙來曰此駒大父之行實也葬已三十九年矣而墓石未建取斬一言表于墓以示子孫余閱其文知君之為善人也有是父固宜有御史君為之

子中屠氏世居于汴宋靖康之亂避禍難者圖南守墳墓者留北君留北者之後也考諱信仁金為考城令君幼好書務實踐從趙禮部秉文游效其字法金季遷祀河南被兵重以饑饉人相食且盡君幸而存亦遭俘掠將同羣衆就戮以次及君無懼色軍中梁吾僧竒其狀貌呼之與語留寘左右獨免受刃梁以君歸懽愛若兄弟未幾人誣告梁陷以重辟君為畫計辯析事竟得解隨梁遷鄆占籍壽良致遠既生才氣殊特梁妻以女偕

弟效貞隸業東平郡庠課試中選官復其家始與梁異  
居梁汝州州長也君隱於賈衡量必公息不取贏儲米  
以備歉則平糶廣貸饑者饋之食貧不能償所負焚  
券勿責田宅相隣偶有侵斥輒遜其畔素貯秘方療帶  
下疾捐貲製藥給施救活甚夥宋平家畜奴虜餘二百  
指或以直購弗許悉縱為民思復故鄉者給以行橐嘗  
有人遺一囊在道上又有一人遺一斗在門內莫知誰  
何多方訪覓還畀其主勤儉治生中年交方外友恬澹



寡欲致遠兒時問何事可立身君督勗以學內師金進士解器之外師鄆牧嚴侯所聘梁希然遂成大器後任御史辭於君曰御史言職也媿娶則瘵官忠直則累親願大人勿掛懷抱君曰汝其勉哉吾不憂也及聞折姦明誣聲譽四達則喜曰吾有子矣至元戊子冬致遠來侍明年己丑四月三日君卒某生當金承安庚午之十月享年八十先墓在汴圯於河流別葬壽良節順鄉之閻村配張氏後四年壬辰二月十三日卒其生當金明

昌甲子之八月享年八十九祔葬于君之兆子男二致遠仕至廉訪僉事效貞安豐縣丞女二適宋孫男八伯騏驥駒駟駟驊騮駟其一湖南道廉訪司知事其二真州學錄其四江西省掾餘未仕女五適李適馮適傳適劉李未行而亡李者翰林侍講學士之紹也曾孫男五鑄鑑某鈞鉉女七適吳適母適成餘在室噫此皆善人之子之孫之曾玄也夫觀木者必尋其本觀水者必溯其原申屠君生值亂離其艱其劬而若子若孫若

子之孫孫之子顯聞于世蕃毓于家豈非前人一念之  
善為之本原也哉余既與君之孫厚又嘗與君之孫堦  
李之紹共談故不讓而表君之墓俾君之子子孫孫世  
增其善以光于前以聞于後善愈積則慶愈豐慶愈豐  
則傳愈永苟至於是申屠氏積善之報又奚啻如今所  
觀而已

元贈承務郎龍興路南昌縣尹熊君墓表

府君諱日廣字春甫王考聰宋貢士考公並不仕世居

豫章郡南昌縣之盧觀國朝既得江南乃徙郡城之西  
偏敦信義樂賓朋訓子尤篤特身謹而謙存心厚而寬  
善譽著鄉里孝行稱於宗族非甚豐裕隨力應告貸之  
人或不能悉償者勿問歲遇旱澇悉發儲粟周匱急黠  
吏嘗加以重役他人多致敗家而處之泰然比及役滿  
不能有所損晚年逍遙閒適清趣和氣融液浹洽大德  
己亥八月甲寅無疾而逝年六十三是歲十二月庚申  
歸葬廬觀之原配何氏後九年卒子仲賢仲貴仲榮仲

華仲貴承務郎吉安路萬安縣尹兼勸農事以廉能名  
蒙恩封贈父母而府君受南昌之命何氏追封恭人往  
歲子被旨召赴禁林時仲貴從事江西行省識予於公  
館今將勒石墓道以彰天渥之榮求予文文之予素知  
能為豫章大姓又聞府君為一邑善人而萬安之政績  
能不忝於親其美皆可書也是以不辭而表其墓焉孫  
男德新瑞州路儒學錄次德明曾孫男二女一  
故贈承事郎樂陵縣尹張君墓表

河間張策起自畎畝承父母命暨其弟簞學于國子學數年後俱得仕官陞七品泰定二年秋父之賢贈承事郎樂陵縣尹母李氏贈恭人策每對子涕泣謂兄弟以宦學故弗獲朝夕定省親病弗及侍聞而至家親已歿矣追痛如割雖生奚為此子南還而策求文表親之墓誠孝誠哀其志可閔乃為述其父之行而俾壽諸石策之諡予者曰策先代濟南利津人也大父避地因家樂陵吾父字世英躬耕養親時或樵采鬻諸市以供甘旨

農隙從師授書通其大義大父嘗疾思生鯉居在平陸  
莫能致也夜冒寒走二百里得之以歸縣署為吏非所  
欲持心平恕遇事剖決悉當廉慎自將不激不隨以事  
留府忽心悸亟馳而旋則大父病已三日極力醫治弗  
救居喪毀瘠葬日大雨呼天長號雨遽止雲開漏日既  
掩壙雨復作人咸異焉有為盜者諭之曰爾取非已之  
物蓋圖自利事敗陷刑適以自害曷不思乎盜愧悟改  
過嘗夜經澤中迷所之大呼求救有應者曰前有深淵

陷者必死慎勿往可隨吾行以杖測而前導行三里許乃出于險問其人為誰則曰吾向被誣賴君辯明而脫於獄幸漁於此識君之聲特以報德終不言姓名而去丞相塔思不花總鷹房事吾父提舉山東諸路職是者多並緣侵擾民罹冤苦無從告訐吾父獨不爾所過莫不感悅競持酒食以饋一無所受未幾移疾退間以約濟勤家漸饒裕連年旱澇千里饑饉隨所有賑施全活甚衆疫癘死者相枕藉日辦粥藥給宗黨死則瘞之延



祐七年四月二十二日以疾終年五十八吾母親紡織  
操井臼儉素以相吾父同月先二十一日卒年五十四  
是年五月十八日合葬樂陵東北張岡莊之原生男四  
人策申中書左曹掾授詹事院管勾進階從事郎遷中  
書檢校籙由中書右曹掾授太常禮儀院都事其三早  
逝節甫冠女四人孫男三女亦四策又嘗言其父沈鷺  
恢廓喜愠不形人不善不翅已有人有小失盡忠以  
規孝養甚豐自奉則菲予觀策兄弟殖學致祿趨操不

凡意其必有本始及聞其父之美並信其然嗚呼天人相與應接影響承事君生而淑善沒而榮昌子樂道之固將以為來者勸非特慰孝子之心而已

國子生葉恒母楮氏墓表

國子生葉恒之母既葬矣予在京師數求文表其墓及歸田又以書來請至再噫恒母賢母也今人知孟母之賢以有孟子為之子孟子所以為孟子者無他擴充其仁義禮知之心而已是心也孟子有之恒亦有之充不

充在乎為不為恒如舍去俗學而學孟子是使其母為  
孟母也孝莫大焉不求諸已之實而求人之文以顯其  
親外也恒曰吾母諱淨真姓褚氏世家越之餘姚生宋  
咸淳乙丑二月十九日年二十二來歸奉舅姑孝事夫  
順治紡績蠶織勤於內外族姻睦男恒恂女適陳亨王  
壽朋孫男震大元至治辛酉十二月十三日歿明年葬  
鄞縣朔鳳鄉青溪之原恒又名遜家于鄞

吳文正集卷六十八